



Mateyo na Banikolaiti

*by*

William Marrion Branham



# Mateyo na Banikolaiti

Emoniseli 2.15 : “Lisusu yo ozali na bamosusu oyo bazali kosimba mateyo na Banikolaiti lokola, oyo Ngai nayinaka”.

Bozali komikanisela ete nalimbolaki na Eleko ya Efese ete liloba oyo, *Nikolaiti*, euti na maloba mibale ya lokota na Baela : *Nikao* oyo elingi koloba *kokonza*, pe *Lao*, oyo elingi koloba *bandimi*. Nikolaiti elingi koloba “*kokonza bandimi*”. Bongo mpo na nini likambo yango ezali ya nsomo boye? Ezali ya nsomo mpo ete Nzambe apesa Lingomba na Ye soko moke te na maboko ya bakonzi baponama oyo basalaka na mposa ya politiki. Apesaki Lingomba na Ye na bato oyo batiami na Nzambe, batondisami na Molimo, babikelaka Liloba oyo bakambaka bato na koleisaka bango Liloba. Akaboli bato na milongo te na lolenge ete bato bakambema na bonganganzambe bosantu moko boye. Ezali solo ete bakambi basengeli kozala basantu, kasi esengeli pe kozala bongo mpo na liyangani mobimba. Lisusu, Liloba elobi ata na esika moko te ete banganganzambe, bateyi to bamosusu bazali babongisi kati na Nzambe na bato, pelamoko elobi te ete bakabwani ntango bazali kosambela Nkolo. Nzambe alingi ete banso balinga Ye pe basalela Ye elongo. Bonikolaiti ezali kobebisa mibeko oyo na kokabola bateyi na bato pe kokomisa bakambi bakonzi na esika ya basaleli. Solo mateyo oyo ebandaki na eleko ya liboso na lolenge ya mosala. Emonani ete kokoso eutaki na maloba mibale : “bampaka” (ba-presbite) pe “bakengeli” (ba-eveke). Atako Likomi etalisi ete bampaka bazalaka ebele na lingomba moko na moko, bamosusu (lokola Ignace) babandaki kolakisa ete mosala ya eveke ezalaki ya kozala moto na liboso to kozala na bokonzi pe koyangela bampaka. Nzoka nde bosolo na yango ezali ete liloba oyo “mpaka” elingi koloba oyo moto yango azali, nzoka nde liloba oyo “eveke” elingi koloba lotomo ya moto yango moko. Mpaka ezali nde moto yango. Eveke ezali nde lotomo ya moto yango. “Mpaka” etalisaka ntango nyonso pe ekotalisa ntango nyonso bobele ntango boni moto aumeli kati na Nkolo. Azali mpaka, ezali te mpo ete baponaki ye

to mpo ete babulisaki ye, pe bongo na bongo, kasi mpo ete AUMELI KOLEKA. Akomeli koleka, alakisami koleka, azali moto ya sika te, bakoki kotielala ye motema na ntina na makambo oyo abikela pe bomoi ya boklisto oyo emekami ntango molai. Kasi te, ba-eveke basukaki na mikanda ya Polo te, kasi batalaki maloba ya Polo ntango abengaki bampaka ya Efese na Milete, na Misala 20. Na molongo ya 17 elobami ete abengisaki “bampaka” pe na molongo ya 28 babengami bakengeli (ba-eveke). Pe ba-eveke yango, (na ntembe te bazalaki na mposa ya politiki pe na mposa makasi ya bokonzi) balobaki na etingeya ete Polo alingaki nde koloba ete “bakengeli” balekaki mpaka ya esika moko oyo makoki ya mosala na ye ezalaki kosuka bobele na lingomba na ye. Mpo na bango eveke akomaki na ntango yango moto oyo bokonzi na ye ezalaki likolo na bakambi ebele ya bisika na bisika. Likanisi ya boye elongobanaki uta na Likomi te ata pe na lisituale te, nzoka nde ata moto monene lokola Polycarpe atengamaki na ngambo ya kobongisama ya boye. Na yango, oyo ebandaki na lolenge ya mosala na eleko ya liboso ekomaki mateyo mpenza, pe etikali bongo kino lelo. Ba-eveke bazali kaka koloba ete bazali na nguya ya koyangela bato pe ya kosala na bango ndenge balingi, kotia na mosala ya koteya bisika balingi. Oyo ezali nde koboya bokambemi ya Molimo Mosantu oyo alobi : “Botiela Ngai Polo pe Balanaba pembeni mpo na mosala Naponeli bango”. Oyo ezali kotelemela Liloba pe kotelemela Klisto. Matai 20.25-28 : “Yesu abiangi bango pe alobi ete, Boyebi ete mikolo na bapagano bazali mikonzi likolo na bango pe bato minene bakonyokola bango na makasi. *Nde kati na bino ezala bongo te*. Ye oyo alingi kozala monene kati na bino, akoma mosungi na bino pe ye oyo alingi kozala moto na liboso na bino, azala moombo na bino. Lokola Mwana na moto ayei mpo na kosungama te kasi mpo na kosunga pe kopesa bomoi na Ye lokola lisiko mpo na mingi”. Matai 23.8-9 : “Bino bobiangama Labi te, zambi moko azali Molakisi na bino, ye Klisto. Bino nyonso bozali bandeko. Bobianga moto tata awa na mokili te, zambi Moko azali Tata na bino, Oyo na likolo”.

Mpo na kokomisa yango lisusu polele koleka, nakolimbola Bonikolaiti na lolenge oyo boye. Bomikaniseli ete elobami na

Emoniseli 13.3: “Moko na kati na mito na ye ezalaki lokola soko ezokaki kino kufa, nde mpota na ye na kufa ebikaki. Mokili mobimba ekamwi pe ebilaki nyama”. Sasaipi toyebi ete moto oyo ezokaki ezalaki nde Bokonzi ya ba-roma oyo ya bopagano, nguya oyo monene ya politiki ya mokili mobimba. Moto yango etelemaki lisusu lokola “bokonzi ya molimo oyo ya Katoliko ya ba-Roma”. Bolanda yango malamumu. Nini yango Roma ya bopagano esalaki oyo ezalaki na ntina ya elonga na ye? Ye, “akabolaki mpo na kokonza”. Yango nde ezalaki momboto ya Roma – kokabola mpo na kokonza. Mino na ye ya ebende ezalaki kopasola pe kolia. Baoyo apasolaki pe aliaki bakokaki lisusu kotelema te lokola ntango abukaki Carthage pe asilisaki yango nye. Bobele momboto yango ya ebende etikalaki kati na ye ntango atelemaki lokola lingomba ya lokuta, pe lolenge na ye ebongwani te – kokabola mpo na kokonza. Yango nde bonikolaiti pe Nzambe ayinaka yango.

Nzoka nde ezali likambo ya kala oyo eyebani malamumu ete ntango libunga yango ekotaki na mayele mabe kati na lingomba, bato bakomaki kowelana mpo na lotomo ya eveke, mbano na yango ezalaki ete ebonga yango ekomaki kopesama na bato bayekoli mingi koleka, bato na bozui mingi pe bato na makanisi ya politiki. Boyebi pe miango ya bato ekomaki kozua esika ya bwanya na Nzambe pe Molimo Mosantu azalaki lisusu koyangela te. Ezalaki mpenza mbeba ya nsomo, mpamba te ba-eveke bakomaki koloba ete ezalaki lisusu na ntina te kozala na bizaleli ya boklisto oyo emonani polele mpo na koteya Liloba to mpo na kokokisa milulu kati na ndakonzambe mpamba te biteni pe milulu nde ezalaki na litomba. Yango epesaki nzela na bato mabe (bapenguisi) ete bapasola etonga.

Na mateyo oyo ya bato ya kotombola ba-eveke na esika oyo epesameli bango te kati na Makomi, likambo oyo elandaki ezalaki ya kopesa nkombo ya lokumu na lolenge ya mpete oyo ekomaki bolandani ya bokonzi kati na losambo; mpamba te eumelaki te ete bazua baepiskopo ba lokumu likolo na ba-eveke, pe bakardinal likolo na baepiskopo ba lokumu pe banda na eleko ya Boniface wa basato bazuaki papa moko likolo na bato nyonso, *Pontife*.

Na mateyo ya Nikolaiti pe bosangisi ya boklisto na bobabele esengelaki kokokisa mpenza oyo Ezekiele amonaka na mokapo ya 8.10: “Boye nakotaki pe natalaki; pe tala, ndenge nyonso na biloko na kolandaka pe nyama na mbindo, pe bikeko nyonso na ndako na Yisalaele ikomamaki na bitutu nyonso”. Emoniseli 18.2: “Agangi na mongongo makasi ete, Ekwei! Babele monene ekwei! Esili kokoma efandelo na milimo mabe, na boloko na milimo na mbindo nyonso, na boloko na bandeke nyonso na mbindo bayinami; mpo ete mabota nyonso basili komela vinyo na kongala na pite na ye”.

Nzoka nde mateyo oyo ya Nikolaiti, kokonzama oyo etiamaki kati na lingomba endimamaki malamumu na bato ebele te mpamba te bato yango bakokaki kotanga mokanda moko boye to buku moko boye ya Liloba oyo ekomami na moto moko atondi na bolamu na Nzambe. Bongo lingomba esalaki nini? Ebenganaki balakisi na sembo pe etumbaki babuku. Balobaki: “Esengeli na boyekoli oyo ekeseni mpo na kotanga pe kososola Liloba. Yango wana ata Petelo alobaki ete makambo mingi oyo Polo akomaki ezalaki makasi mpo na kososola”. Lokola balongolaki Liloba epai na bato, baumelaki te mpo ete bakoma koyoka bobele oyo sango asengelaki koloba, pe kosala oyo azalaki kolobela bango. Bazalaki kobenga yango Nzambe na Liloba na Ye mosantu. Bakonzaki makanisi pe bomoi na bato pe bakomisaki bango baombo ya bonganzambe oyo ya nko.

Sasaipi soki bolingi kozua elembo ete Lingomba Katoliko esengaka bomoi pe makanisi ya bato, boyoka bobele mobeko ya Theodose X. *Mobeko mwa yambo mwa Theodose.*

Mobeko oyo epesamaki mpenza mpenza nsima na ye kozua libatizi na Lingomba ya Liboso ya Roma. “Biso bakonzi misato oyo tolingi ete bato na biso bakangama makasi na losambo oyo elakisami na Santu Petelo epai na Ba-roma, oyo ebatelami sembo na bonkoko pe oyo ezali sasaipi koyambolama na pontife, Damase ya Roma, na Petelo, eveke

ya Alexandrie, moto oyo azali na bosantu ya bantoma yengebene na malako ya Bantoma pe mateyo ya Nsango Malamu; tondimela Bonzambe ya Tata, Mwana, pe Molimo Mosantu, oyo bakokani na nkembo kati na Bosato Bosantu. *Topesi motindo ete bandimi ya eyamba oyo babiangama Baklisto ya Katoliko; bilema nyonso ya bandimi ya ba losambo mosusu topesi bango nkombo ya nsoni ya batomboki, pe topekisi mayangani na bango ete mabiangama mangomba.* Nsima na bango kokweisama na kosambisama na Nzambe, basengeli pe kozela ete etumbu monene oyo bokonzi na biso, oyo ekambami na bwanya ya lola, ekosepela kopesa bango. . .”

Mibeko zomi na mitano ya bitumbu oyo epesami na mokonzi oyo kati na mibu mingi boye ezangisaki bamisioni makoki na bango nyonso ya kosambela, elongolaki bango na misala nyonso ya leta pe ekanelaki kofutisa bango lomande, kobotola biloko na bango, kobengana bango na mboka pe na makambo mosusu, koboma ata bango.

Boyebi? Tozali kokende nde wana lelo oyo.

Lingomba Katoliko ya Roma emibengaka lingomba Mama. Emibengaka Lingomba ya liboso to ya ebandeli. Ezali mpenza solo. Ezalaki Lingomba ya Liboso ya Roma oyo ya ebandeli oyo ezongaki nsima pe ekweaki kati na lisumu. Yango nde emibongisaki liboso. Kati na yango misala pe na nsima mateyo ya bonikolaiti ezuamaki. Moto moko te akowangana ete azali mama. Azali mama pe aboti bana basi. Nzoka nde mwana mwasi autaka na mwasi. Mwasi alati bilamba motane afandi likolo na ngomba nsambo ya Roma. Azali mwasi na pite pe aboti bana basi. Bana yango ya basi bazali nde mangomba ya Bamisioni oyo babimaki epai na ye pe na nsima bazongaki na kobongisama pe na bonikolaiti. Mama oyo ya mangomba bana basi abengami mwasi na pite. Ye azalaki mwasi oyo azalaki sembo te na ndai na ye ya libala. Abalanaka na Nzambe na nsima atangwaki pe asalaki pite na zabolo pe kati

na pite na ye aboti bana basi oyo bakokani mpenza na ye. Bosangani oyo ya mama na bana basi etelemeli Liloba, etelemeli Molimo pe na bongo etelemeli Klisto. Iyo, MOTEMELI NA KLISTO.

Boye liboso ete nakende mosika nalingi kobakisa ete baveke oyo ya ebandeli bakanisaki ete bazalaki likolo na Liloba. Bazalaki koloba na bato ete bazalaki na makoki ya kolimbisa masumu na bango ntango bazali kotubela masumu yango. Yango etikala kozala solo soko moke te. Babandaki kobatisa bana mike na ekeke ya mibale. Solo mpenza bazalaki kobatisa mpo na mbotama ya sika. Ezali likambo ya kokamwa te ete bato bazala na mobulu lelo. Soki bazalaki kati na mobulu na eleko wana, penepene na Pentekote, lelo bazali na motindo ya bato oyo bazangi mpenza elikia, na ntango oyo pene na mibu nkoto mibale ekaboli bango na solo ya ebandeli.

Oo, Lingomba na Nzambe, elikia ezali bobele moko. Zonga na Liloba pe kangama na yango.

#### MATEYO NA BALAME

Emoniseli 2.14 : “Ozali na bamosusu wana na mateyo na Balame, oyo alakisaki Balaka kotiela bato na Yisalaele libaku ete balia mbeka na bikeko pe basala pite”.

Ekoki kosalema te ete kobongisama ya lolenge ya nikolaiti ezala kati na lingomba bongo mateyo mosusu oyo ezanga pe kokota. Bomoni, soki bolongoli Liloba na Nzambe pe mosala ya Molimo oyo ezali nzela ya kosambela (“esengeli ete basambeli na Ngai basambela Ngai na Molimo pe na solo”), na bongo bokosengela kopesa bato lolenge mosusu ya kosambela mpo na kokitana yango, pe bokitani oyo ezali nde Bobalame.

Soki tolingi kososola oyo mateyo na Balame ezali kati na lingomba ya Kondimana na Sika, ekozala malamumu ete tozonga kotala oyo yango ezalaka kati na lingomba ya Kondimana na Kala pe tosalela yango na eleko oyo ya misato pe tomema yango kino lelo.



Lisolo oyo ezuami na Mituya longwa na mokapo ya 22 kino na oyo ya 25. Nzoka nde toyebi ete Yisalaele ezalaki libota oyo eponamaki na Nzambe. Bazalaki ba-pentekotiste ya ntango na bango. Bamibombaki na nse na makila, bango nyonso babatisamaki kati na Mbu Motane pe babimaki na mai, bazalaki koyemba na Molimo pe kobina na nguya ya Molimo Mosantu, wana Mariam, mosakoli mwasi, azalaki kobeta ndundu. Malamu, nsima na bango kosala mobembo na mwa ntango moko boye, bana na Yisalaele oyo bakomaki na Moaba. Bozali komikanisela nani Moaba azalaki. Azalaki mwana mobali ya Lota oyo abotaki ye na bana na ye ya basi, pe Lota ye moko azalaki mwana na ndeko na Abalayama, na bongo Yisalaele pe Moaba bazalaki bandeko. Nalingi ete bomona yango. Bamoaba bayebaki solo, atako babikelaki yango to te.

Na bongo bana na Yisalaele bakomi na ndelo ya mboka na Moaba pe batindeli mokonzi bantoma mpo na koloba : “Tozali bandeko. Tika biso toleka na mboka na bino. Soko bato na biso to nyama na biso balei to bameli eloko moko, tokofuta yango na motema moko”. Kasi mokonzi Balaka asilikaki mingi. Mokonzi ya etonga wana ya nikolaiti alingaki kolekisa lingomba te na bilembo na yango, bikamwa na yango pe komonisama ndenge na ndenge ya Molimo Mosantu, na bilongi na bango oyo ezalaki kongenga na nkembo na Nzambe. Elingaki kozala likama monene, mpo akokaki kobungisa ndambo na bato na etonga na ye. Na bongo Balaka aboyaki kolekisa Yisalaele. Solo mpenza, azalaki kobanga bango mingi, na lolenge ete akendekei kokutana na mosakoli moko na lifuti na nkombo Balame pe asengaki ye ete azala molobeli na ye epai na Nzambe pe kosenga epai na Oyo-na-Nguya-Nyonso ete alakela Yisalaele mabe, pe azangisa bango nguya. Pe Balame, lokola azalaki na mposa ya kokota na makambo ya politiki pe kokoma moto monene, asepelaki mpenza kosala yango. Kasi lokola esengelaki ete abelema na Nzambe, pe asolola na Ye mpo ete Alakela libota mabe, mpamba te akokaki kosala yango ye moko te, akendekei kosenga Nzambe soki akokaki kozua

ndingisa na Ye mpo na kokende. Ezali mpenza lokola Banikolaiti oyo tozali na bango lelo te? Bazali kolakela mabe baoyo nyonso balingi kolanda nzela na bango te.

Ntango Balame asengaki epai na Nzambe ndingisa ya kokende, Nzambe aboyaki. Oo, oyo nde nsoni! Kasi Balaka atiaki molende, na kolakaka libonza pe lokumu monene koleka. Na bongo Balame azongaki epai na Nzambe. Sikawa bobele eyano moko ya Nzambe esengelaki kokoka. Kasi mpo na moto ya moto makasi oyo Balame te. Ntango Nzambe amonaki mayele na ye mabe, Ayebisaki ye ete atelema pe akende. Akangaki biloko na mpunda na ye nokinoki pe akendeki. Asengelaki kososola ete ezalaki bobele mokano na ndingisa na Nzambe, pe ete akokaki kolakela bango mabe te ata soki esengelaki ete azonga kuna mbala ntuku mibale pe ameka mbala ntuku mibale. Boni bato ya lelo bakokani na Balame! Bazali kondimela Banzambe misato, bazali kozua libatisi na bibiangelo misato na esika ya NKOMBO, nzoka nde Nzambe azali kotinda Molimo na Ye likolo na bango pelamoko atindaki Yango likolo na Balame, pe bazali kokoba kondima ete bazali mpenza kati na solo, nzoka bazali mpenza Babalamiti ya solosolo. Bomoni, mateyo na Balame. Ata bongo bokoba. Bosala ndenge bolingi. Balobaka : “Malamu, Nzambe apamboli biso. Esengeli kozala malamumu”. Nayebi ete Apamboli bino. Nawangani yango te. Kasi ezali bobele nzela yango moko ya ebongiseli oyo Balame alandaki. Ezali nde ya kotia ntembe na Liloba na Nzambe. Ezali malakisi ya lokuta.

Pe Balame atambolaki na bolema na nzela kino ntango mwanje na Nzambe akangelaki ye nzela. Kasi mosakoli wana (eveke, kardinal, ntoma mokonzi, mokonzi pe moyangeli mokonzi) likanisi ya lokumu, ya nkembo pe ya mbongo ebomaki mpenza miso na ye na makambo ya molimo na lolenge ete amonaki mwanje oyo atelemaki wana te, na mopanga na loboko. Atelemaki wana mpo na kopekisa elema ya mosakoli oyo. Mpunda moke emonaki ye pe ezalaki kokimakima kino esuki na kotuta lokolo ya Balame na etutu ya mabanga.

Mpunda etelemaki pe eboyaki kokoba kokende. Ekokaki lisusu kokende te. Bongo Balame akitaki pe abandaki kobeta ye. Boye mpunda ebandaki kolobela Balame. Nzambe asalaki ete mpunda yango eloba monoko mosusu. Mpunda yango ezalaki oyo esangisama te; ezalaki momboto na ebandeli. Elobaki na mosakoli oyo abomamaki miso : “Ngai nazali mpunda na yo te, namemaka yo na bosembo te?” Balame alobaki : “Iyo, iyo, ozali mpunda na ngai pe omemaka ngai na bosembo kino sasaipi; soko nakoki lisusu kotambwisa yo te, nakoboma yo...oo! likambo nini oyo, nazali kosolola na mpunda? Ezali likambo ya kokamwa, nakanisaki ete nazalaki koyoka mpunda koloba pe nazalaki koyanola yango”.

Nzambe alobaka ntango nyonso na monoko mosusu. Alobaki na elambo ya Belesasala pe lisusu na Pentekote. Azali kosala yango lisusu lelo. Ezali likebisi ya kosambisama oyo ekomi pene.

Na nsima mwanje amonanaki polele epai na Balame. Alobaki na Balame ete soko mpunda te mbele asilaki kokufa na ndenge amekaki Nzambe. Kasi ntango Balame alakaki ete akozonga, azuaki likebisi aloba bobele oyo Nzambe ayebisaki ye.

Bongo Balame akendeki pe atongaki bitumbelo nsambo mpo na nyama ya peto oyo ya mbeka. Abomaki mpate ya mobali, elilingi ya boyei na Masiya. Ayebaki oyo asengelaki kosala mpo na kobeleva na Nzambe. Abongisaki mekaniki na ye malam; kasi dinamiki te; pelamoko lelo. Bozali komona yango te, Banikolaiti? Bana na Yisalaele bazalaki wana na lobwaku, bazalaki kopesa mbeka ndenge yango moko, kosalaka makambo ndenge yango moko, kasi bilembo ezalaki kobila bobele ngambo moko. Bobele ngambo moko nde bazalaki na Nzambe kati na bango. Lolenge na libanda ekomema yo esika moko te. Ekoki kozua esika ya Molimo te. Yango nde esalemaki na Nicée. Bandimaki mateyo ya Balame, kasi mateyo oyo ya Nzambe te. Pe batutaki libaku; iyo, bakweaki. Bakomaki mpenza bibembe.

Nsima na ye kopesa mbeka, Balame abelemaki mpo na kosakola. Kasi Nzambe akangaki lolemo na ye pe akokaki kolakela bango mabe te. Apambolaki bango.

Balak angalaki na nkanda, kasi Balame akokaki kosala eloko moko te mpo na esakweli yango. Elobamaki na Molimo Mosantu. Boye Balak ayebisaki Balame ete akita na nse mpenza, na lobwaku, alingaki komona bana na Yisalaele oyo bazalaki na nsima mpo ameka kozua ntina moko boye bongo akoka kolakela bango mabe. Mayele oyo Balak asalelaki ezali mayele oyo bazali kosalela lelo. Mangomba minene oyo ebongisami ezali kotala bitonga mike uta na likolo, nyonso oyo bakozua kati na bango mpo na koyeisa nsoni, bakobimisa yango libanda pe bakobelela yango. Soki bato na mikolo oyo babiki kati na masumu, moto moko akolobela yango te; kasi soki moko kati na baponami akoti kati na mikakatano, zolonale nyonso ekopanza nsango yango na mboka mobimba. Iyo, bana na Yisalaele bazalaki na mabe na bango, (ngambo na nzoto). Bazalaki pe na ngambo moko oyo ekokaki kopesama lokumu te; kasi atako babongaki te, na nzela na mwango na Nzambe oyo esalaka na nzela na boponami, na nzela na ngolu kasi na misala te, **BAZALAKI NA LIPATA NA MOI PE LIKONZI NA MOTO NA BUTU, BAZALAKI NA LIBANGA LIBETAMI, NYOKA NA MOTAKO, BILEMBO PE BIKAMWISI.** Batatolamaki — na bango moko te, kasi na Nzambe.

Nzambe azalaki kotiela Banikolaiti wana motema te, na mapolomi na bango ya filozofi, ya mibeko pe ya likindo, na bibongiseli na bango nyonso kitoko pe biloko bileki kitoko oyo moto akoki kodondwa na yango; nzoka nde Atielaki Yisalaele motema mpo ete bazalaki na Liloba litatolami kati na bango. Na ntembe te Yisalaele ezalaki mpenza kongenga te, wana bautaki kobima nokinoki na Ezipito, kasi ata bongo ezalaki libota oyo epambolami. Nyonso oyo bayebaki na mibu koleka nkama misato ezalaki bobele kobokolo bibwele, kosala bilanga pe kouwela na boombo mpo na kobanga liwa na nse na

bokonzi ya bato na Ezipito. Kasi bakomaki nsomi na ntango wana. Ezalaki libota oyo epambolami na nzela ya bokonzi na Nzambe. Na ntembe te ete Moaba ezalaki kotiola bango. Mabota mosusu nyonso, esalaki se bongo. Bibongiseli etiolaka ntango nyonso baoyo bazangi ebongiseli, to bakosengisa bango ete bakota na ebongiseli, to bakoboma bango soki baboyi kotosa.

Moto akoki kotuna ngai : “Ndeko Branham, eloko nini ezali kosala ete okanisa ete Moaba ezalaki ebongiseli pe ete Yisalaele ezalaki ebongiseli te? Ozui likanisi yango wapi?” Nazui yango bobele awa kati na Biblia. Nyonso ezali awa na bililingi. Nyonso oyo ekomami na Kondimana na Kala na lolenge ya lisolo ekomami kuna mpo na kolakisa biso, mpo tozua liteya uta na yango. Ezali awa na Mituya 23.9 : “Longwa na songe ya ngomba namoni ye, longwa na ngomba natali ye. Tala, bato bakofandaka BOBELE BANGO MOKO, pe BAMITANGI KATI NA MABOTA NA MOKILI TE”. Yango wana. Nzambe azali kotala longwa na songe ya ngomba, longwa na nse na lobwaku te mpo amona ngambo na bango ya mabe pe akweisa bango. Nzambe azali komona bango ndenge Alingaki komona bango — longwa na likolo na bolingo pe mawa. Bazalaki kofanda BOBELE BANGO MOKO pe bazalaki ebongiseli te. Bazalaki na mokonzi te. Bazalaki na mosakoli, pe mosakoli azalaki na Nzambe kati na ye na nzela ya Molimo; pe Liloba ezalaki koya epai na mosakoli, pe Liloba ezalaki kopesama epai na libota. Bazalaki na kati ya O.N.U. te. Bazalaki na kati ya Lisanga na Mangomba ya Molongo te, na ba-Baptiste te, na ba-Presbyterien te, na Assemblée de Dieu te to pe na etonga mosusu te. Basengelaki kozala na kati na yango te. Basangisamaki na Nzambe. Basengelaki na toli ya lisanga moko boye te — bazalaki na “Yango elobi Nkolo” kati na bango. Aleluya!

Kasi Balame atako ayebaki ndenge nini basengeli kobeleva na Nzambe pe soki akokaki kosala ete emoniseli eya uta na Nkolo wana alatisami na nguya ya lolenge mosusu,

atako nyonso wana, azalaki kaka eveke na etonga ya mabe. Na bongo asalaki nini mpo asepelisa Balak? Azuaki mwango moko oyo kati na yango Nzambe alingaki kotindama na makasi ete Apesa Yisalaele etumbu ya liwa. Pelamoko Satana ayebaka ete akokaki kopenguisa Eva (kokweisa ye na lisumu ya nzoto) mpo Nzambe asalela etumbu ya liwa oyo Asilaka kokata mpo na lisumu, pelamoko Balame ayebaka ete soki akokaki komema Yisalaele ete asala lisumu Nzambe alingaki kosengela kopesa bango etumbu ya liwa. Na bongo azuaki mwango mpo amema bango baya kosangana na lisumu. Atindelaki bango mbela ete baya na feti ya Bala wa Peor (boya kosambela elongo na biso). Pe bato na Yisalaele, na ntembe te lokola basilaka komona bafeti ya bato na Ezipito bakanisaki ete ezalaki mabe mpenza te ete bakende kaka kotala ata pe kolia na bato wana elongo. (Kutu mabe nini ezali kati na koyokana na bandeko? Tosengeli ata bongo kolinga bango, boye te, soki bongo te tokobenda bango ndenge nini?) Kozala na boboto esalaka na yango mabe soko moke te — ndenge bazalaki kokanisa. Kasi ntango basi wana ya Moaba na elateli mabe babandaki kobina pe kolongola bilamba wana ezalaki bango kobalukabaluka na mabina na bango ya rock and roll na twist, mposa mabe ekotelaki bayisalaele pe bamemamaki kati na ekobo, pe Nzambe na nkanda na Ye abomaki nkoto ntuku minei na mibale kati na bango.

Yango nde oyo Constantin na bakitani na ye basalaki na Nicée pe nsima na Nicée. Babengisaki bato na Nzambe na likita. Pe ntango lingomba bafandaki mpo na kolia, pe batelemaki mpo na kobina (na kati ya lolenge ebele ya kosambela, na milulu pe na bafeti ya bapagano oyo basilaki kopesa yango nkombo ya milulu ya Baklisto), bakangamaki na motambo; basalaki pite. Pe Nzambe amibendaki.

Mbala nyonso oyo moto atangwaka na Liloba na Nzambe pe akotaka na lingomba na esika ete ayamba Molimo Mosantu, moto yango akufaka. Mokufi! Tala oyo ye azali. Kokota na lingomba te. Kokota na ebongiseli te mpo bindimeli pe

mimeseno ekanga yo to nyonso oyo ekoki kokamata esika ya Liloba pe ya Molimo, soki te okufi. Esili. Okufi. Okabwani na Nzambe seko na seko!

Yango nde esalemi na bileko nyonso uta ntango wana. Nzambe azali kokangola bato. Babimi na nzela ya makila, babulisami na nzela ya Liloba, baleki na nzela na mai ya libatisi pe batondisami na Molimo; kasi nsima na mwa ntango bolingo na bango ya liboso ekomi mpio pe moto moko akozua likanisi ete basengelaki kosala ebongiseli mpo bamibatela pe bamipesa lokumu, pe babandi kozongela kosala ebongiseli na libota ya mibale pe ntango mosusu ata liboso na yango. Bazali lisusu na Molimo na Nzambe te, kasi bobele na lolenge ya kosambela. Bakufi. Bamisangisi na bindimeli pe na lolenge ya libanda pe bomoi ezali kati na bango te.

Na bongo Balame alongaki kosalisa Yisalaele pite. Boyebi te ete pite ya nzoto ezali bobele molimo yango moko oyo ezali kati na losambo ebongisami? Nalobi ete molimo ya pite ezali nde molimo ya ebongiseli. Pe baoyo nyonso basalaka pite esika na bango ekozala kati na libeke na moto. Yango nde Nzambe azali kokanisa mpo na ebongiseli. Iyo mesie, mwasi na pite na bana na ye ya basi bakokende na libeke na moto.

Mangomba oyo ebongisami ezali ya Nzambe te. Ezalaka soko moke te pe ekozala soko moke te. Ezali molimo mabe oyo ekabolaka libota na Nzambe bakonzi na ngambo moko pe bandimi na ngambo mosusu; ezali, bongo, molimo mabe oyo ekabolaka bato kati na bango. Yango nde ebongiseli pe mangomba oyo ebongisami basalaka. Na nzela ya ebongiseli bakabwanaka na Liloba na Nzambe, pe bamikotisaka kati na ekobo ya molimo.

Sasaipi botala ete Constantin apesaki bato bafeti ya lolenge mosusu. Ezalaki bafeti ya kala ya bapagano oyo bapesaki yango nkombo ya sika oyo eutaki na lingomba, to na makambo mosusu bakamataki milulu ya Baklisto oyo babebisaki na nzela ya milulu ya bopagano. Akamataki

losambo ya nzambe moi pe abongolaki yango na losambo ya Mwana na Nzambe. Na esika basepela yango mwa 21 sanza ya zomi na mibale, mokolo bazalaki kosepela feti ya nzambe-moi, bapusaki yango na mwa 25 sanza ya zomi na mibale pe babengaki yango mokolo ya mbotama ya Mwana na Nzambe. Kasi toyebi ete Abotamaki na sanza ya minei na eleko oyo bomoi ebimaka, na sanza ya zomi na mibale te. Pe bakamataki feti ya Astarte pe babengi yango feti ya Pasika epai wapi Baklisto basengeli kosepela liwa pe lisekwa ya Nkolo. Solo ezalaki feti ya bapagano mpo na Astarte.

Batiaki bitumbelo na ndakonzambe. Bakotisaki bikeko. Bapesaki na bato oyo babengaki endimeli ya bantoma, atako tokoki komona yango kati na Biblia te. Balakisaki na bato kosambela bankoko na bongo bakomisaki Lingomba Katoliko ya Roma lingomba na kosambela bawa oyo eleki monene na mokili. Bandeke nyonso ya mbindo bazalaki na kati ya ebombamelo yango. Pe bamisioni bazali wana na bibongiseli na bango bazali kosala motindo moko.

*Bazalaki kolia mbeka na bikeko.* Sasaipi nalobi te ete oyo elingi koloba ete bazalaki kolia mosuni mpenza oyo epesami mbeka na bikeko. Solo atako likita ya Yerusalem e telemelaki makambo ya boye, Polo atalaki yango na motuya mingi te mpo azalaki koloba ete bikeko ezali mpamba. Ezalaki bobele likambo ya lisosoli longola se ntango ezalaki kozokisa motema ya ndeko moko na motau na bongo nde epesamaki ndingisa te. Lisusu, Emoniseli oyo ezali mpo na bato ya Mabota kasi Bayuda te mpo ezali likambo ya mangomba na Mabota. Nazali komona likambo oyo ndenge moko namonaka maloba na Nkolo : “Soko bokolia mosuni na Ngai te, pe bokomela makila na Ngai te, bokozala na bomoi kati na bino mpenza te. Moto akobika bobele na mapa te, nde na Maloba nyonso makobimaka na monoko na Nzambe”. Bozali komona ete kolia ezali mpenza nde, na elobeli ya molimo, kozala kati na. Na yango ntango bato yango bazalaki kogumbama liboso na bikeko, kopelisa babuzi, kosepela bafeti ya bapagano, kotubela masumu na bango epai na bato (makambo



oyo nyonso ezali ya losambo na zabolo), bazalaki kati na boyokani na zabolo, kasi na Nkolo te. Bandima bandima te, bazalaki kati na bosambeli bikeko. Bakoki na bango koloba nyonso balingi ete bitumbelo pe mpaka ya malasi ezali wana bobele mpo na kozongisela bango makanisi ya mabondeli na Nkolo to oyo nyonso bakoki kokanisa ete yango elingi koloba; pe bakoki koloba ete kobondela liboso na ekeko ezali bobele mpo na kopesa motuya koleka na libondeli na bango; ete ntango batubelaka epai na sango, batubelaka mpenza nde epai na Nzambe na mitema na bango, pe ntango balobaka ete sango alimbisi bango, ezali bobele oyo azali kosala na Nkombo na Nkolo; bakoki koloba oyo balingi kasi bazalaki nde kati na boyokani na losambo oyo eyebani malamumu ya Babilone, oyo ya Satana pe bamisangisi na bikeko pe basali pite na molimo, oyo elingi koloba liwa. Bakufi.

Na bongo Lingomba pe leta babalanaki. Lingomba esanganaki na bikeko. Lokola nguya ya leta ezalaki nsima na bango bakanisaki na ntango yango ete, “Bokonzi eyaki pe mokano na Nzambe ekokisamaki na mokili”. Ezali kokamwisa te ete Lingomba katoliko ya Roma ezelaka bozongi na Nkolo Yesu te. Bandimaka bokonzi ya mibu nkoto te. Bokonzi na bango ya mibu nkoto bazali na yango bobele awa. Papa azali kokonza sasaipi pe Nzambe azali kokonza kati na ye. Na bongo ntango Akoya, mpo na bango, esengeli kozala ntango likolo ya sika pe mabele ya sika ekobongisama. Kasi bazali komikosa. Papa azali mokonzi ya lingomba ya lokuta, pe bokonzi ya mibu nkoto ekozala, kasi ntango yango ekozala ye akozuama na kati na yango te. Akozuama esika mosusu.

## LIKEBISI

Emoniseli 2.16 : “Na bongo bongola motema na yo; soko bongo te, Nakoya epai na yo noki, pe Nakosala etumba na bango na mopanga na monoko na Ngai”.

Akoki lisusu koloba nini? Nzambe akoki kozanga komona lisumu ya baoyo bamemaki Nkombo na Ye na mpamba? Nzela

ezali bobele moko mpo na kozua ngolu na ntango na lisumu : BONGOLA MOTEMA. Yambola ete osali mabe. Yaka epai na Nzambe mpo ozua bolimbisi pe ozua Molimo na Nzambe. Ezali motindo oyo euti epai na Nzambe. Kozanga kotosa ezali liwa, mpo Alobi : “Nakosala etumba na yo na mopanga na monoko na Ngai”. Nyama abundisaki basantu, kasi Nzambe akobundisa nyama. Baoyo babundisaki Liloba bakomona mokolo moko Liloba kobundisa bango. Ezali likambo monene kolongola, to kobakisa na Liloba na Nzambe. Mpamba te baoyo babongolaki yango, baoyo basalaki na yango oyo balingaki, suka na bango ekozala nini soki bobele liwa to libebi? Kasi ngolu na Nzambe ezali naino koganga : “Bongola motema”. Oo, boni makanisi ya bobongoli motema ezalaka kitoko. Namemi eloko te na maboko na ngai, nakangami bobele na ekulusu na Yo. Namemi mawa na ngai. Nabongoli motema kozala oyo nazali, pe mpo na oyo nasalaki. Sasaipi ezali nde makila, eloko mosusu te bobele makila na Yesu. Yango ekozala nini? Bobongoli motema, to mopanga na liwa? Yo nde osengeli kopona.

(Ekamatami na *Botalisami na Bileko Nsambo na Lingomba.*)

Esalemi na lingala na mobu 2004.

LINGALA

©2004 VGR, ALL RIGHTS RESERVED

VOICE OF GOD RECORDINGS

P.O. BOX 950, Jeffersonville, Indiana 47131 U.S.A.

[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)